

# **SECZIUN PEZ AULT**

PROTOCOL DALLA RADUNONZA GENERALA

DILS 25-01-2019 ALLAS 20.00 URAS

ELL' AULA A VELLA





---

**Tractandas:**

1. Beinvegni ed elecziun dils dumbravuschs
  2. Approbaziun dil protocol dalla radunonza generala dils 26-01-2018 Approbaziun dil protocol dalla radunonza da secziun dils 20-04-2018
  3. Rapports annuals
  4. Rendaquen dil cassier, rapport annual dils revisurs ed approbaziun dil quen annual
  5. Fixar las contribuziuns annualas
  6. Prender conclus sur da propostas per mauns dalla suprastanza centrala dalla uniun da catschadurs cantunala
  7. Approbaziun dil program annual
  8. Honoraziuns / mutaziuns
  9. Numnar in commember da honur
  10. Elecziuns per ina perioda d'uffeci da dus onns
  11. Elecziuns dils delegai dalla secziun per il cuoz d'in onn
  12. Indemnisaziun dalla suprastanza dalla secziun
  13. Diversas informaziuns
  14. Varia
-



## 1. Beinvegni ed elecziun dils dumbravuschs

Il president Duri fa a tuts in cordial beinvegni. In spezial beinvegni va als guardia selvaschinas Arnold Caminada e Pirmina Caminada.

Las tractandas vegnan approbadas tenor l'invitaziun. Il president declara la radunonza sco aviarta.

**Presents:** 42 personas

**Perstgisas:** Silvan Caduff, Lucas Caduff, Conrad Capeder, Sep Casanova, Gian Marco Casanova, Diego Casanova, Enrico Casanova

Sco dumbravuschs vegnan Roland Casanova e Marco Casanova proponi ed eligi unanimamein.

## 2. Approbaziun dil protocol dalla radunonza generala dils 26-01-2018

### Approbaziun dil protocol dalla radunonza da secziun dils 20-04-2018

Ils presents han neginas objecziuns ni completaziuns enviers ils protocols, ils quals vegnan approbai unanimamein.



### 3. Rapports annuals

#### President:

Preziadas catschaduras, preziai catschadurs

Igl onn 2018 ha entschiet sco usitau per la secziun Pez Ault cun la radunonza generala a Morissen.

Nies cau da tgira, Adrian Casanva, ha demissionau suenter 10 onns. Sco successur ei Daniel Soler staus prompts da surprender quei uffeci. El ei vegnius eligius dalla radunonza dils 20.04.2018 unanimamein per quei post.

La suprastonza ei sesida ensemen 2 gadas igl onn vargau. Ils puncts principals da quellas sesidas ein l'organisaziun dil di da tgira, il tir intern, la sera famigliara eav.

Cun la decisiun dalla radunonza generala dils 26.01.2018 havein nus saviu entscheiver cun la secunda fasa dalla realisaziun dalla sanaziun dil taschaffa ballas per nies stan a Bual. La damonda da baghegiar havein inoltrau alla vischnaunca il davos da schaner 2018. La lubientscha havein retschert ils 18 da settember 2018. Damai che nus havein survegniu negins daners dallas bancas per realisar nies project havein stuiu encurir autras instanzas per quei intent. Cun agid d'Alexi Derungs sco anteriur emploiau tier ina banca ha el saviu gidar nus. Nus havein survegniu in credit senza tscheins da 40'000 francs dalla Selig "Stifung" da Turitg. Quel ha la secziun da pagar anavos enteifer 8 onns mintgamai en la summa da 5000 francs per onn. L'emprema gada sin il davos da settember 2019. Ad Alexi Derungs in grond engraziament.

Las lavurs ein avanzadas aschi lunsch che la vischnaunca ha fatg sia part (sanaziun dil terren contaminau) l'entschatta october. Las lavurs da miradur e per tschentar ils indrez ein finidas. Ils tschaffa ballas ein montai e las lavurs da lennari ein finidas. Las lavurs restontas vegnan fatgas la primavera. Ils cuosts ein tochen ussa sco planisai.

Ils 24.02.2018 ei stau la radunonza da presidents a Favugn.

Nossa sera famigliara ha giu liug 2018 a Cuschnaus. L'uniun da giuventetgna da Morissen ha organisau quei per nus. Jeu sun dil meini che quei ei stau ina biala sera ed jeu engraziel ad els aunc inagada persunter.

Ils 18.4 ed ils 12.12 ein las radunonzas dil district Glogn stadas a Glion nua che Adrian, Daniel e mia paucadad han priu part.

Venderdis, ils 20.04.2018, ei nossa radunonza da secziun stada a Bual, Vella. Il gi da tgira da primavera ei staus ils 21.04.18.

La sonda, ils 12.05, ha la radunonza da delegai dil BKPJV giu liug a Sursaisa.

Naven dall'entschatta matgl entochen il davos d'uost ha la secziun dau la pussevkladad da sittar sin nies stan a Bual.

Ils 12.08.2017 ha nies tir intern giu liug. A quei tir han 54 firaduras e firadurs priu part, quei ei stau 7 dapli che 2017.



Il premi principal, la patenta da catsch'aulta, vegn aunc tratgs la sera da catschadurs il mars.

Era uonn ha in commember da nossa secziun fatg il cuors da capo tiradur.

Quei ei Julian Derungs. Ad el in grond engraziament persunter.

Uonn ha il marcau da Daniev giu liug a Degen. Als catschadurs da Degen e Vattiz in grond engraziament ch'els han organisau quei per la secziun. Igl ei stau ina biala bar cun grondas ed intensivass discussiuns, sco ei s'auda tier il marcau da Daniev.

Sco davos engraziel a mes consuprastonts Beat, Adrian, Daniel, Samuel e Dario per lur buna e premurada lavur per nossa secziun. Igl ei stau emperneivel da luvrar ensemen cun vus. Era a tut ils auters ch'ei s'engaschai en ina moda ni l'otra per nossa secziun in grond engraziament.

Morissen, schaner 2019

Duri Camenisch president

Suenter l'approbaziun dil rapport engrazia igl actuar a nies president per sia fetg gronda lavur. Duri sa prender encunter in applaus dils presents.

**Cau da tgira:**

Preziadas catschaduras, preziai catschadurs

Onn hai jeu surpriu igl uffeci dil cau da tgira d'Adrian. L'entschatta era tut niev per mei, aschia che Adrian ha duvrau da bia gnarva cun mei. Grond engraziament ad el per igl agid ed il sustegn.

Uonn havein nus giu bellezza aura duront il gi da tgira. Aschia che certs han fatg suadas da luvrar. Igl ei vegniu luvrau bein els biars loghens, mo in liug ei staus in cass per sesez. Suenter ha ei aunc dau ina flota grillada sil stan a Bual.

Pil 2018 ha Adrian inoltrau lavurs per ina summa da 4262 francs. Vegniu fatg eis ei lavurs per 3560 francs. La differenza da 700 francs manca perquei ch'igl ei buca vegniu segau uonn enta Vrin (Plaunet) e si Morissen (Plaunca seniastra). Pil 2019 havein nus dau en lavurs per ina summa da fleivel 5'000 francs. La summa ei carschida perquei ch'jeu sun dil meini ch'ins sto annunziar avunda, aschia ch'ins sa luvrar dapli culs candidats vid ils pojects ch'ei pagai bein.

El 2018 hai jeu giu negins candidats aschia ch'igl ei stau in bien temps per entscheiver mia carriera.

Pil 2019 hai jeu survegniu 2 annunzias da candidats. Quei ei Caminada Cornelia e Casanova Luca da Vrin. Entochen tier igl examen dalla teoria ella primavera 2020, sto mintga candidat prestar 50 uras da tgira. Sperel che nus vegnin a far buna lavur en favur dils animals e la natira.

Per igl onn vargau engraziel jeu a vus tuts per vies engaschi da tgira.

Sin bien seveser e tochen il gi da tgira.

Il cau da tgira

Daniel Solèr

Suenter l'approbaziun dil rapport engrazia nies president a Daniel per sia fetg buna lavur.

Daniel sa prender encunter in applaus dils presents.

**Cau dil stan da sittar:****Exercezis**

La sesiun da tir ha entschiet ils 5 da matg 2018. En tut han 15 occurrenzas d'exercezis giu liug.

**Tirs**

Ils 18 d'ust 2018 ha il tir intern giu liug. Se partecipai ein 57 tiraduras e tiradurs.

**Munizium**

Sco enconuschent han ins saviu retrer uonn ina nova patrona ch'ei in tec pli bienmarcada che la "Norma", vul gi 1 franc per toc.

**Lavurs da manteniment**

Duront la sesiun da tir han il cau dil stan e siu substitut cun entgins gidonters segau 6 gadas igl areal entuorn il stan da sittar.

Tier las schibas eis ei stau necessari da remplazzar 2 motors. Tier il stan da sittar ha ina lingia d'aua stuiu vegnir midada ora.

**Sanaziun dil pegliaballas**

Il pegliaballas da lenna ed il terren ein vegni sanai en collaboraziun cun la vischnaunca. Las lavurs da rumida ein succedidas entras entgins voluntaris ch'ei stai prompts da segidar duront il settember. In grond engraziament als gidonters.

Silsuenter ei vegniu installau in niev pegliaballas che secumporta cun las pretensiuns dalla lescha. Las lavurs finalas per la sanaziun dil pegliaballas vegnan aunc cuntinuadas il 2019.

**Lavur cumina**

Ils 26 da matg 2018 ed ils 30 da zercladur ei vegniu fatg lavur cumina tier il stan da sittar. Igl ei vegniu remplazzau ils pals dalla seiv e tagliau giu caglias. Plinavon eis ei stau necessari da midar ora il centrum dallas schibas. L'emprema gada ein 6 participonts segidai, la secunda gada 8. Quater da quels participonts ein stai presents omisduas gadas. Entgins han duvrau l'atgna maschina per exequir las lavurs. A tuts bien engraziament persuenter.

Ils 13 d'october ei vegniu fatg uorden e rugalau naven il stan per igl unviern.

Uonn ha ei funcziunau stupent cun ils responsabels per la survigilanza da sittar. Cun pintgas excepziuns han tuts adempliu siu pensum tenor plan.

Igl ei pli u meins adina puspei ils medems ch'ei stai prompts da prestar lavur cumina. Jeu engraziel zun fetg a quels buns gidonters per la fideivladad e per la lavur prestada.

Vrin, ils 25 da schaner 2018

Il cau dil stan

Samuel Caviezel

Suenter l'approbaziun dil rapport engrazia nies president a Samuel per sia fetg gronda lavur. El sa prender encunter in applaus dils presents.



#### **4. Rendaquen dil cassier, rapport annual dils revisurs ed approvaziun dil quen annual**

Nies cassier Beat Collenberg presenta il quen annual. Il quen annual digl onn 2018 siara giu cun entradas da 45'950.20 francs ed expensas da 29'910.50 francs. Aschia seresulta in plus da 16'039.70 francs.

Il revisur da quen Marcel Casanova menziunescha che Alexi Derungs ed el hagien controllau il quen annual. Il quen ei vegnius menaus schuber ed en uorden e tut ils mussaments necessaris seigien avon maun. Marcel engrazia a Beat per sia fetg buna lavur.

Marcel Casanova propona el num dils revisurs d'approbar il quen.

Sinaquei vegn il quen digl onn 2018 approbaus unanimamein.

Nies president engrazia a Beat per sia lavur prestada. Beat sa prender encunter in applaus dils presents.





## 5. Fixar las contribuziuns annualas

Nies president metta cuort avon co las contribuziuns annualas ein fixadas:

Commembers A: 100.-

Commembers B: 55.-

Commembers passivs: 50.-

La suprastonza ei dil meini da far neginas midadas.

Propostas ord las retschas dils commembers dat ei neginas.

Las propostas vegnan approbadas unanimamein.

## 6. Prender conclus sur da propostas per mauns dalla suprastonza centrala dalla uniun da catschadurs cantunala

Neginas propostas dalla radunonza e dalla secziun.

## 7. Approbaziun dil program annual

Program digl onn 2019

- 25-01-2019 radunonza generala
- 23-02-2019 radunonza da presidents a Favugn
- 02-03-2019 sera familiara ad Uors
- 17-04-2019 radunonza dil district a Glion
- 26-04-2019 radunonza da secziun a Vella
- 27-04-2019 gi da tgira da primavera
- 11-05-2019 radunonza da delegai a Cazis
- Matg – uost 2019 trenament da sittar
- 10-08-2019 tir intern
- Dezember 2019 radunonza dil district
- Fin december 2019 marcau Daniev a Lumbrein
- 07-03-2020 sera familiara

Cun motivs extraordinaris sa vegnir sittau il program dil tir intern ina jamna avon.

Il program digl onn vegn approbaus unanim.



## 8. Honoraziuns / mutaziuns

### Honoraziuns

Las honoraziuns vegnan era fatgas alla radunonza generala e buca mo alla sera familiara, ch'era quels numms seigien francai el protocol.

- Commembers che completeschan egl onn current (2019) 60 onns e ch'ein sil pli pauc 25 onns senza interrupziuns commembers dall'uniun cantunala, daventan veterans dall'uniun cantunala, quei ei: Duri Camenisch da Morissen

- Commembers che ein senza interrupziuns 25 onns commembers da nossa secziun egl onn current (2019), daventan veterans da secziun, quei ein: Caduff Gionin da Vattiz e Marcus Cajochen

### Mutaziuns

Entradas: Selina Camenisch Surin, Laura Casanova Vignon, Silvan Caduff Vattiz, Flavio Capaul Degen, Ladina Camenisch Surin, Vanessa Derungs Vella, Luca Lombris Vella

Ils novs commembers vegnan pri si unanim. Nies president fa ad els in cordial beinvegni en nossa secziun.

Extradas: Dario Lombris Vrin(A), Otto Derungs Castrisch(B)



## 9. Numnar in commember da honur

Sco commember da honur vegn Natali Lombris da Vella proponius.

El ei staus fetg engaschus per nossa secziun. El ei staus 28 onns fetg activs en nossa secziun.

Quei sco president, schef dil stan da sittar, dar cuors da cuschinar eav.

La radunonza generala numna Natali unanim sco commember da honur entras in fetg grond applaus.

## 10. Elecziuns per ina perioda d'uffeci da dus onns

### Actuar

Igl actuar Dario ha buca demissionau. Dario vegn proponius ed eligius unanim.

### Cau dil stan

Il cau da tgira Samuel ha buca demissionau. Samuel vegn proponius ed eligius unanim.

### Revisur da quen

Sco revisur da quen ha Alexi Derungs buca demissionau. Alexi vegn proponius ed eligius unanim.

### Suppleant revisur da quen

Sco suppleant revisur da quen vegn Gioni Capaul reeligijs unanim.

### La cumission da tgira

La cumission da tgira vegn eligida mintg'onn. Ils commembers dalla cumission da tgira: Simon Camenisch, Bruno Solèr, Lucas Caduff, Gian Marco Casanova, Marco Casanova, Martin Alig ed Ivo Caduff. Els vegnan proponi ed reeligi unanim.

Il president engrazia a tut quels ch'ei stai en uffeci tochen ussa, als tals che restan en uffeci, sco era als novs officials ch'ei stai prompts da surprendre l'incarica.

## 11. Elecziuns dils delegai dalla secziun per il cuoz d'in onn

Noss'unioni sa tarmetter 4 delegai alla radunonza da delegai dil BKPJV a Cazis ils 11 da matg.

Nies president spetga sin propostas, ni ils quals che han interess, duein s'annunziar.

Cunquei che negin s'annunzia fa Duri la proposta dad encurir ils delegai alla radunonza digl avrel.

## 12. Indemnisaziun dalla suprastonza dalla secziun

La suprastonza impenda mintg'onn ina massa uras lavur per la secziun. Ella ei dil meini che quei astgass vegnir indemnisau.

Cunquei fa la suprastonza la proposta dad indemnisar mintga commember cun 500 francs ad onn.

La proposta vegn approvada cun 32 vuschs encunter 0 vuschs entras las radunonza generala.



### 13. Diversas informaziuns

Arnold Caminada fa enquala informaziun pertuccont las suandontas tematicas:

- las cefras dalla catsch'aulta 2018
- il stregn unviern actual
- observaziuns dil luf
- project da marcar tscharvas
- tschoccadad da camutschs e capricorns en Val

Duri informescha davart la campagna dil BKPJV encunter la iniziativa encunter la catscha speciala.



## 14. Varia

- Las lavurs da finiziun sil stan da sittar vegnan fatgas egl avrel e matg.
- Daniel Solèr vegn a prender part al cuors da capo tiradur.
- Il district da catscha 2 (Bostg) survegn la primaver ina ''Drohne'' che sa era vegnida duvrada en nossa secziun per spindrar anseuls.
- La secziun ei vegnida fundada egl onn 1931. (damonda da Luis Caduff)
- Il di da tgira dilis 27 d'avrel sto eventualmein vegnir stuschaus pervia dalla vegetaziun. Schiglioc sa la secziun vegnir castigada. (Informaziun Marco Casanova)
- Retus Blumenthal appellescha da reponderar la taxa da tgira per ils commembers (B)
- Il president Duri Camenisch engrazia a tuts e siara la sesida allas 21.15 uras.

Degen, ils 8 da fevrer 2019

Igl actuar

Dario Caduff